

سؤال

مين اللي قال: الدنيا حلوه
اسألوه قال ليه كده!
وبأي عين شافها وهي بتفترس
أول حبيبه ف المراهقه
وآخر حبيبه
بعد الجواز
وحلم كان يتمنى

يصحى الصبح يلقاه ع المخده
ودموع ما نزلتس ف أوانها
ولسه واقفه جنب قلبه
وخجل مالوش أي منطق
مسك لسانه ف لحظه فاصله
بين السعاده والندم
وقرار جريء صمم عليه
لكنه ضاع من شنطته
وخوف وراثي
قفل ف وشه التجربه

وقلق لطيف
كان جوه كُتبه
لكنه سابه يختفي
بين السطور.

اللي قال الدنيا حلوه
كان شخص أهبل من دجاجة
أو يجوز ..
عبقري!

مارس ٢٠٠١